



Editorial

Trai merdia mester mas atencion...

Pero den tur sentido...

Ultimamente e proyecto di Traimerdia a bin den publicidad, pa un asunto cu tabata muestra menos positivo. Tabata trata di e colaboradonan di e proyecto, cu tin caba un full time job den oranan di mainta na e scolnan na Aruba. Loke nos ta comprende di loke e ministro encarga a expresa, ta su preocupacion pa e sobrecargo di trabao cu e personanan aki por experimenta. Por lo tanto e no ta haya mal idea pa limita e orario cu e personanan aki ta traha en total. Cu esey e problema ta keda totalmente resolvi? Segun nos impresion no, pasobra naturalmente e capacidad pa atende mucha mester keda mescos, y hasta realmente lo tin cu aumenta den e proximo añanan. Y esey anto ta implica cu mester hopi mas colaborador pa sostene e proyecto, o ta miho nos papia di un institucion, pasobra esey e mester bira. Y pakico esey? Pasobra ora nos ta papia di mehora e atencion pa nos muchanan, aki ta unda nos mester cuminsa. Nos tin e sentimiento cu hopi biaha e proyecto aki ta haya cierto atencion, den e sentido cu ta 'leuk' cu nos tin algo asina, pero te ey tambe. Esey no mester ta asina.

Nos ta hincando awor miyones den un plan di crisis social, loke nos no ta bay cuestiona. Si ta esey ta necesario pa nos cuminsa crea un oportunidad pa atende e famianan mas den problema, esey tin prioridad. Sin embargo, nos mester mira un tiki mas leu tambe. Nos por bisa por ehemplo cu mayornan mester ta mas responsable pa nan yiunan y mehora nan supervision. Pero con nan ta bay haci esey si nan tin dos o tres job pa purba mantene nan cabes riba awa den un situacion economico cada vez mas dificil pa e famianan di menos recurso? No ta aki e parti grandi di nos ayudo mester ta, pa crea e capacidad pa atende e muchanan aki na lugar di laga nan bay cas mientras no tin hende disponible pa atende nan.

Ademas, nos ta comenta hopi biaha riba e enorme cantidad di trafico mainta y atardi di hende cu ta bay trabao o ta purba yega nan cas den oranan di atardi, pero nos no ta mira e enorme trafico cu tin den oranan di merdia, na momento cu tantísimo mayor ta riba caya pa bay busca nan yiunan na scol? Cuanto di nos cu ta den e edad di tin yiu cu ta bay scol, mester laga trabao para un banda pa bay busca nan, hiba nan cas, percura pa tin hende pa

atende nan, pa por bay trabao atrobe? Y esey si tin hende pa atende nan den e oranan ey, sino con pa resolve esaki?

Lo no ta miho anto cu nos ta cuminsa pensa seriamente den un inversion grandi den enseñanza, pero specialmente dirigi na amplia e 'naschoolse opvang' na tur scol. Kico e ampliacion aki lo significa financieramente? Bastante, tumando na cuenta cu e centronan di Traimerdia conhuntamente lo ta atendiendo algo mas di mil mucha, mientras e total di e muchanan na scol basico y kleuterschool caba ta coriendo den mas di 10.000 mucha. Es decir cu apenas un 10% di e total di e muchanan aki ta bay na e facilidadnan di Traimerdia. Logicamente ta surgi e pregunta si nos mester crea facilidad pa tur mucha; e mester bira algo obligatorio? Esey sigur cu no; lo tin hopi mayor cu lo kier resolve nan problema nan mes, nan por tin suficiente recurso pa paga hende pa atende nan yiunan na cas, etc. En todo caso, e idea mester ta cu pa e famianan cu no por resolve nan problema, e posibilidad mester t'ey pa atende nan.

Nos ta tende e pregunta skerpi caba cu ta bin pa nos: "Y cuanto e baina aki ta bay costa? Y ta ken lo mester busca pa haci e trabao aki? Awor caba tin escasez di hende... Laga nos purba 'set the record straight.' Nos ta papiando aki di e peligro mas grandi cu nos sociedad ta core. Y si nos ta keda mantene e mentalidad cu cierto hende por haya algo, pero no di mas tampoco, pasobra placa di gobierno, es decir di comunidad, ta pa gasta na otro cos? No ta asina nos a end up cu un San Nicolas, cu segun cu e tabata bay atras, envez di haya mas e tabata haya menos recurso? No ta nos gobiernonan ta e prome responsablenan pa laga e lugar ey bay atras? Nos mester juist bolter e mentalidad y cuminsa inverti mas tanto unda e necesidadnan ta mas grandi. Unda tin mas mucha ta bay scol sin desayuno, mas necesario ta pa nan haya desayuno na scol. Y si nan mester bay cas merdia, sin mayor pa atende nan y sin cuminda riba mesa, no ta nos mester percura pa net nan ta haya lunch na scol, y cuida te ora e mayor(nan) ta disponibel pa atende nan? Si nos ta keda pensa cu e problemanan aki ta keda resolvi 'por arte de magia' cu tiki recurso, nos ta mal ekiboca, y nos no ta bay logra nos meta tampoco. Tempo pa cambio.